

# Bahagian Ulu Nerus sekata calonkan Hussein, Mahathir

KUALA TRENGGANU, Khamis (Bernama) — Perdana Menteri, Datuk Hussein Onn dan Timbalannya, Dato Seri Dr. Mahathir Mohamad masing-masing dicalonkan oleh UMNO Bahagian Ulu Nerus bagi jawatan presiden dan timbalan presiden parti itu.

Pencalonan diluluskan sebulat suara dalam persidangan perwakilan bahagian itu kelmarin yang dirasmikan oleh Setiausaha Politik kepada Menteri Kebudayaan, Belia dan Sukan, Dr. Nordin Selat.

Untuk jawatan naib presiden, bahagian itu mencalonkan Menteri Kewangan Tengku Razaleigh Hamzah, Menteri Pelajaran Datuk Musa Hitam dan Encik Abdul Ghaffar Baba.

Speaker Dewan Undangan Negeri, Datuk Abdullah bin Abdul Rahman dipilih semula menjadi ketua bahagian.

Beliau mendapat 209 undi mengalahkan lawan tunggalnya, Encik Abdul Rashid Ngah, Ahli Dewan Undangan Negeri kawasan Seberang Takir, yang mendapat 129

undi.

Ahli Dewan Undangan Negeri kawasan Langkap, Encik Salleh Mohamed dipilih semula sebagai timbalan ketua bahagian dengan bekas-setiausaha bahagian, Encik Hussein Mohamed sebagai naib ketua.

Persidangan itu juga meluluskan sebulat suara satu usul tergepar dari jawatankuasa bahagian menolak konsep kerjasama antara Barisan Nasional dan Berjasa di negeri Trengganu.

Satu lagi usul yang diluluskan mendesak Kerajaan Pusat menambah secara istimewa anggaran pembangunan bagi negeri Trengganu memandangkan Kerajaan Pusat akan mendapat hasil yang banyak dari telaga-telaga minyak di perairan negeri ini.

Bahagian itu juga mendesak Kementerian Dalam Negeri memindahkan perkhemahan pelarian Vietnam di Pulau Besar ke satu tempat lain di luar negeri Trengganu.